



16.10.2024

UKA 2024/44

Jens NapätôK', Naleraq

Uunga siunnersuut: Illulortiternernut aningaasalersuineq pillugu inatsisip allanngortinnissaa pillugu Inatsisartut Inatsisaat (Tullerriiaarinissamut uppernarsaaneq, sanaartortitsinernut naatsorsuutit, kaaviiartitsinissamut inerteqqut, piffissaq sioqqullugu taarsigassarsianik akiliineq il.il.)

(Ineqarnermut Attaveqaasersuutinullu Naalackersuisoq)

Siullermeerneqarneranut oqaaseqaat

Illulortiternernut aningaasalersuineq pillugu inatsisip allanngortinnissaa pillugu Inatsisartut Inatsisissaattut siunnersuut (Tullerriiaarinissamut uppernarsaaneq, sanaartortitsinernut naatsorsuutit, kaaviiartitsinissamut inerteqqut, piffissaq sioqqullugu taarsigassarsianik akiliineq il.il.) pillugit Naalackersuisut sinnerlugit Ineqarnermut Attaveqaasersuutinullu Naalackersuisup illulortiternernut aningaasalersuineq pillugu inatsisip allanngortinnissaa pillugu Inatsisartut Inatsisaannut siunnersuut saqqummiussaanut imatut Naleqqamiit oqaaseqaateqassaagut.

Inatsisartut inatsisissaattut siunnersuut ineqarnermi iluarsaaqqinnerup atuutsinneqalerneranut ilaatinneqarluni saqqummiunneqarpoq taamatullu ineqarnermut aningaasalersueriaatsinik nalilersuinermit inassuteqaatit aallaavigineqarlutik.

Naleqqamiit oqaatigissavarput maannakkut aaqqissuusseqqinnissamik siunnerfiuneqartut isumaqatiginngilluinnaqqissaaratsigit isumaqaratta ineqarnikkut aaqqissuusseqqinneq nunap inuinit iluaqutaasussamik aammalu inuunerannut naleqarnerulernerutitsisussamik inuppassuarnut aaqqissuunneqartariaqarluinnartoq.

Naalackersuisut maannakkut ineqarnikkut aaqqissuusseqqinniarnat innuttaasunut tamanut artukkiisussanngorlugi aaqqissuunniarneqartoq Naleqqamiit isumaqarfigaarput aammalu inuiaqatigiit toqqissillutik inuuneqalersinnaaneranut aqutissiuunerunngilluinnaqqissaartuusiq isumaqarfigalugu akerlianik aaqqissuusseriarnerigalua inuppassuarnut artukkiinerulluinnartuusussaasoq Naleqqamiit ernumassutigaarput.



Pitsaasumik ineqarnermut politikeqqarnissarput pingaaruteqartorujussuuvoq taamatullu ineqarnermut pitsaasumik politikkeqarnissarput arlalinnik toqqammaveqarpoq ilaatigut makku aallaavigalugit:

Inissiassamik pissarsinissaq ajornannginnerusariaqarluinnarnera angusariaqarpoq pitsaasumik ineqarnerup pingaartillugu politikkeqarfigineratigut qulakkeerneqassammat kikkunnut tamanut ajornannginnerusumik pitsaasunillu pissiarnisariuminartunik ineqartitsinikkut, tamannalu tamanut atuuttussamik aaqqissuunneqartariaqarluni.

Ineqarnikkut pitsaasumik politikkeqalernitsinni ineqarnerup aqunneqarnera pitsaasumik aaqqissuunneratigut pinaveersaartitassat pingaaruteqartut ilaattut qulakkiigassaavoq nunami inissittumi najugaqartuusugut anitaasoqarani angerlarsimaffeeruttarnerup qimanneqarnissaat, taamaasiornikkut inuiaqatigiit toqqissisimasuullutik inissisimanissaat pingaarnerpaaq qulakkeerneqassammat tassalu toqqissimasumik angerlarsimaffeqarneq.

Aningaasarsiornikkut ineriartorneq ilinniarfissallu pilersissavai pitsaasumik politikkeqarnerup aningaasallu kaaviartitat sumiiffinni qulakkeerneqassapput illoqarfissuarni kisimi ineriartornerup ingerlanera qimallugu nunarput tamaat isigalugu politikikkut ineqarnermi pitsaasumik politikkeqarluni aningaasaliisarnerup kingunerissavaa aningaasalersuinerit ataavartut sumiiffinni tamani ineriartorfiusut aamma sanaartornikkut siuariartortitsiffiusut maannakkut akerlianik inissisimaneq qimallugu uanilu inatsisissami tamanna ajoraluartumik aamma aammaarluni qulakkeerneqarani tamatuma ajortumik inissisimanagerup ingerlaqqiinnarnissaa inissisimaffioqqittussanngorpaa ineqarnikkut politikikkut aaqqissuussigaani ilaartuiniartoqaqqiinnarmat.

Ineqarnikkut politikikkut aaqqitassat ilagaat nukissiuutit mingutsitsiffiunngitsut tamani atuutlernissaat taamaasilluni inissiat pitsaasut aammalu nukissiuuteqarnikkut periarfissaliissuteqarfiusut nunatsinni tamani periarfissaalernissaat, maannakkut aaqqissuusseqqinnermi tamanna qulakkeerniarneqanngilaq akerlianik ilaartueqqiinnarluni aaqqeeriartoqarpoq, tamannalu Naleqqamiit uggoreqaarput.



Pilersaarusiorneq ineriartortitsinerlu pisariaqarlunnarput sumiiffinni tamani, pitsaasumik ineqarnikkut politikkeqarnerup kingunerisassai amerlaqaat pilersaarusiorduarlugillu tulleriaarinikkut ineqarnermut pitsaasumik politikkeqarnerup kingunerissavaa illoqarfiit pilersaarusiorduakkamik aquaalluakkamillu ataavartumik ineriartornissaat, pitsaasumillu ingerlatsinerup inuiaqatigiit ineriartornerat tamarmik tamanna iluaqutigisussaavaat.

Ineqarnikkut tamanut periarfissiiffiusumik ineqarnermut pitsaasumik politikkeqarnikut qulakkeerneqassaaq tamanut periarfissiineq inuiaqatigiillu toqqissisimasumik inissisimalerneranik, tamannalu Naalackersuisut ineqarnikkut aaqqissuusseqqinniarnermi ilanngutinngilluinnarsimavaat.

Inuiaqatigiit toqqissisimaneranut qitiulluinnarlunilu pingaaruteqartorujussuuvog ineqarnikkut pitsaasumik politikkeqarnissaq inuup inuuneranut naleqartinneqarlunilu misigisimaneranut pingaarnersaasa ilagilluinnarpaat.

Toqqissimasumik pitsaasumillu ineqarnermut politikkeqarnerup ilagilluinnarpaat qulanaassallugu inigisanik naapertuuttunik aammalu innuttaasut akilersinnaasaannik peqarnissaq, tamakkulu akitsigut pitsaasumik artukkiinngitsumillu inissiffiullutik ineqarnermut politikkeqarfiginissaat Naalackersuisut saqqummiussaqaarfiginngivippaat akerlianik akisoorujussuarnik innuttaasut artukkerlugit toqqissimanissaraluaq anguniannuarnagu aningaasaq kisimi qitiutillugu aaqqeeriaraluarput ineqarnikut politikkeqarnissaq qiviannuarnagu.

Inissiat naleqquttut innuttaasunik akissaqartinneqartut pisariaqartippagut, taamaaliornikkullu ineqarnikkut aaqqissuusseqqinnitta ilagisussaavaa ataavartumik sanaartornerup aningaasalersornissaa inatsisiliorneq naammangilluinnarpoq ila inuit inissaminnik pitsaasumik naammaginartumik nunami issittartumi najugaqartuusugut pitsaasumik politikkeqarfiginissaat pisariaqartippaat aningaasaq kisimi qitiutinneqarpallaaqaaq inuup inuunera taamatullu inuup toqqissisimaneera aningaasamik pisarineqarsinnaanngilaq pitsaasumik angerlarsimaffeqartitsigutta Kalaaleqatitta kivitseqataasinnaanerat qaffassarujussuassavarput.



Ineqarnermut akilersuutaasartunut naleqqussaaqqiinnerit pisariaqartippagut, qanoq iliuuseqarnissamik pisariaqartitsivugut ineqarnermut akiliutaasartunut apparsaataasussanik taamaaliornikkut innuttaasut artukkernagit toqqissisimasumik angerlarsimaffeqarniassammatta.

Nunatsinnut naleqquttumik illulioriaaseq ilanngullugu suliarineqartussaagaluartoq ajoraluartumik qallunaaniit kingornussagut kisimik aallaavigalugit maannakkut inatsisit mattusersoqqiinnarlugit aaqqissuusseqqinnerat Naleqqaminngaanniit uggoreqaarput ilami nunatsinnut nunap inuinit naleqquttumik alloriarfissatsiarsuaq atornagu aningaasarparujussuit atorlugit nutarsaaniarsarineq ilaartuineq ingerlanniaqqinnera qimallugu nunarput orpippassuaqarfiumngitsoq qisuk kisimi aallaavigalugu illuliortarunnaarluta nunap tunniussinnaasaat atorluarneruniartigit.

Ineqarnermut politikkeqarnissaq pisariaqarluinnarpoq allannguinnissaq piffissanngorpoq SIKU BLOCK periarfissinniartigu periarfissatsialak atorlugu ila takussutissanik periarfissaqareerpoq Sisimiuni marrarmik illuliornikuupput, Uummannamik oqaluffeqarpoq kusanavissumik ujaraasumik kujataani qammassiarpasuit atorlugit illuliortaarnerit ingerlanneqartaarnikuupput taamatullu illuliormi illup silataata qaava takuinnartigit Sanap eqqaaniittoq *Edmondgård*-ikoq maannakkut ukiivik kollegie qaava ukiorpasuit allanngortanngitsoq ila ilinniarfigalugu taamaattut nunatsinnut naleqqunnerusut atornerulerniartigit tassa pissutsit piviusut.

Ineqarnermut pitsaasumik politikkiorta nunap inuinit naleqquttunik akimigut pitsaasumik inissisimasunik taavalu pinngortitap tunniussinnaasai maani pitsaasorpasuit atorluarnerulerniartsigit uagut Naleqqamiit tamakku pimoorullugit qaqilertuarpagut aammalu qinersisoqareerpat Naleraq Naalackersuisooqataalissappat tamakkuupput pingaarnersiuiinnermi tamakkuupput aallartikkasuagassat ilarpassuisa ilaat. Oqaasiinnaanngitsumik allannguisariaqalerpugut oqaasiinnaanngitsumik nunap inui aallaavigalugit politikkeqalertariaqarpugut ila nunap inuinit toqqissisimalersitsisissamut ineqarnikkut politikkeqarnissarput piffissanngorpoq maannakkutuut Naalackersuisut artukkeriikkaminnut qaavatigut artukkeeriaqqinnerat naaggaarluinnarparput torrallaanerusariaqarpugut allamik oqarfiunngilaq *nul point* pikkorinnerusariaqarluinnarparpugut qanoq iliuuseqalertariaqarpugut saperasi isumaqaleritsi qimallugu qanoq iliuuseqaleritsi atuutilertariaqarluinnarpoq.